

**SAMÞYKKTIR KVASIS
SAMTAKA FRÆÐSLU – OG SÍMENNTUNARMÍÐSTÖÐVA**

**1. gr.
Nafn, lögheimili o.fl.**

Nafn samtakanna er *Kvasir, samtök fræðslu- og símenntunarmiðstöðva*.

**2. gr.
Varnarþing**

Heimili Kvasis og varnarþing er lögheimili þeirrar stofnunar sem formaður starfar við hverju sinni.

**3. gr.
Aðilar að samtökunum og réttur til aðildar**

Rétt til aðildar að samtökunum eiga svæðisbundnar fræðslu- og símenntunarmiðstöðvar á Íslandi sem sinna símenntun og öðrum verkefnum skv. samningum við menntamálaráðuneytið. Aðildarumsóknir skulu eingöngu teknar fyrir á aðalfundi. Aðild nýrra félaga er háð samhljóða samþykkt atkvæðisbærra fundarmanna á aðalfundi. Stjórn heldur félagaskrá.

**4. gr.
Markmið, samstarfsaðilar o.fl.**

Markmið samtakanna er:

- Að efla símenntun og háskólanám á Íslandi
- Að efla og auka skilning atvinnulífsins á mikilvægi símenntunar sem auðlindar og fjárfestingar til framtíðar, sem getur bætt afkomu einstaklinga, fyrirtækja og samfélagsins í heild.
- Að efla og stuðla að aukinni samvinnu fræðslu- og símenntunarmiðstöðva.
- Að efla samvinnu við menntastofnanir og aðra þá sem bjóða fullorðinsfræðslu og símenntun í landinu með það að markmiði að auka aðgengi almennings að menntun og þekkingu á heimaslóðum.

- Að vera vettvangur umræðu um fullorðinsfræðslu og símenntun á Íslandi sem og í norrænu og alþjóðlegu samhengi.
- Að gæta sameiginlegra hagsmuna fræðslu- og símenntunarmiðstöðvanna og kynna starf þeirra.
- Að efla skilning á hlutverki fræðslu- og símenntunarmiðstöðva í menntakerfi þjóðarinnar og vinna þeim skilningi stuðnings á opinberum vettvangi.

5. gr.

Stjórn, skipunartími, þóknun stjórnarmanna o.fl.

Stjórn er þriggja manna. Hver stjórnarmaður skal skipaður til tveggja ára í senn, tveir annað árið og einn hitt árið á móti. Stjórnin skiptir með sér verkum, formaður, ritari og gjaldkeri. Hlutgengir til setu í stjórn samtakanna eru starfsmenn og stjórnarmenn fræðslu- og símenntunarmiðstöðvanna. Hver miðstöð tilnefnir einn starfsmann eða stjórnarmann úr sínum röðum sem fulltrúa sinnar miðstöðvar innan Kvasis. Á aðalfundi og félagsfundum ræður einfaldur meirihluti atkvæða tilnefndra fulltrúa miðstöðvanna og fer hver miðstöð með eitt atkvæði.

Fræðslumiðstöðvar Kvasis skiptast á að tilnefna stjórnarmenn, þannig að hver miðstöð tilnefnir einn aðalmann í senn í þeirri röð sem þær koma sér saman um. Stjórn hefur forgöngu um að útfæra slíkt fyrirkomulag. Láti stjórnarmaður af störfum verður nýr stjórnarmaður kosinn í hans stað á næsta aðal- eða félagsfundi.

Stjórnarmenn hljóta ekki laun fyrir störf sín, en útlagður kostnaður sem af störfum þeirra hlýst greiðist af samtökunum.

6. gr.

Verkefni stjórnar, fundir, ákvarðanataka o.fl.

Stjórn samtakanna fer með daglegan rekstur þeirra milli aðalfunda og félagsfunda. Hún skal vinna að markmiðum þeirra og öðrum þeim verkefnum sem henni eru falin af aðal- og félagsfundi. Stjórnin kemur fram fyrir hönd samtakanna út á við og vinnur að sameiginlegum hagsmunamálum fræðslu- og símenntunarmiðstöðvanna.

Stjórnin skal halda fundi eftir þörfum. Halda skal fund ef stjórnarmaður óskar þess. Stjórnarfundur skal boðaður um netföng stjórnarmanna eða á annan tryggilegan hátt. Stjórnarfundur er ályktunarbær ef allir stjórnarmenn eru mættir og ályktun er samþykkt samhljóða.

Stjórnarmaður má ekki taka þátt í meðferð einstakra mála sem varða hann persónulega.

7. gr.

Gerðabók, skráning funda, ákvarðana o.fl.

Tryggilega skal færa til bókar allar ákvarðanir sem teknar eru á aðal-, félags- og stjórnarfundum. Heimilt er að fundargerðir séu unnar í tölvu. Fundargerðirnar skal varðveita á tryggilegan hátt.

8. gr.

Fjárhagur, fjárvarsla, ábyrgð á skuldum, árgjöld, rekstraráætlun o.fl.

Stjórnin ber ábyrgð á rekstri og fjárhag samtakanna. Fjárhagslegar skuldbindingar samtakanna eru aðildarmiðstöðvum óviðkomandi umfram það sem samþykkt hefur verið samhljóða á aðal- eða félagsfundum þar sem fulltrúar allra miðstöðvanna eru mættir eða umboðsmenn þeirra.

9. gr.

Aðalfundur, fulltrúar á aðalfundi, félagsfundir, atkvæðagreiðsla, o.fl.

Aðalfundur ákveður árgjöld, sem standa skulu undir daglegum rekstri samtakanna. Reikningsár samtakanna er almanaksárið.

Stjórn skal leita utanaðkomandi fagaðila til að skoða ársreikning félagsins og leggja skoðaða ársreikninga fyrir aðalfund.

10. gr.

Aðalfundur, fulltrúar á aðalfundi, félagsfundir, atkvæðagreiðsla, o.fl.

Aðalfundur fer með æðsta vald í málefnum samtakanna. Aðalfund skal halda árlega, eigi síðar en fyrir lok maímánaðar. Hann skal boða með tryggilegum hætti um netföng til aðildarmiðstöðvanna með a.m.k. tveggja vikna fyrirvara. Framkvæmdastjóri / forstöðumaður hvernar miðstöðvar ber ábyrgð á boðun til stjórnarmanna sinna og starfsfólks.

Verkefni aðalfundar eru:

1. Skýrsla stjórnar
2. Afgreiðsla reikninga
3. Fjárhagsáætlun og ákvörðun um árgjöld
4. Breytingar á samþykktum
5. Skipun stjórnar
6. Kosning skoðunarmanna
7. Önnur mál

11. gr.

Félagsfundir

Félagsfund skal halda svo oft sem þurfa þykir að ákvörðun stjórnar eða ef þrjár eða fleiri aðildarmiðstöðvar óska þess.

Félagsfund skal boða með tryggilegum hætti um netföng aðildarmiðstöðvanna með hæfilegum fyrirvara.

12. gr.

Atkvæðagreiðsla og réttur til setu á aðal- og félagsfundum

Hver aðildarmiðstöð fer með eitt atkvæði á aðal- og félagsfundum og skal stjórnarformanni samtakanna send tilkynning um það hver fer með atkvæði hennar á aðalfundi og hver til vara í forföllum aðalmanns.

Aðalfundur og félagsfundir eru ályktunarbærir ef fulltrúar $\frac{3}{4}$ hluta aðildarmiðstöðvanna eða umboðsmenn þeirra eru mættir á fund og ef ályktun er samþykkt samhljóða.

Framkvæmdastjórar, starfsmenn og stjórnarmenn aðildarmiðstöðvanna hafa rétt til setu á aðal- og félagsfundum með málfrelsi og tillögurétt.

13. gr.

Breytingar á samþykktum þessum, slit samtakanna o.fl.

Samþykktum þessum verður aðeins breytt með samhljóða samþykki aðalfundar. Tillaga að breytingum á samþykktum skal berast með aðalfundarboði. Séu ekki mættir fulltrúar allra aðildarmiðstöðvanna á aðalfund þar sem tillaga um breytingar á samþykktum liggur fyrir skal boða til framhaldsaðalfundar. Mæti enn ekki fulltrúi viðkomandi miðstöðvar á þann fund getur framhaldsaðalfundur samþykkt breytingu á samþykktunum með atkvæðum allra þeirra sem mættir eru á aukaaðalfundinn. Aðildarmiðstöð getur sagt sig úr samtökunum með tilkynningu þar að lútandi og skal hún send formanni stjórnar Kvasis fyrir komandi áramót og tekur hún þá gildi á næsta aðalfundi.

Samtökum þessum verður slitið með sameiginlegri ákvörðun aðalfundar eða aukaaðalfundar með sömu formerkjum og hér að framan um breytingar á samþykktunum.

Samþykktir þessar taka gildi við samþykkt aðalfundar í Reykjanesbæ 25. mars 2009